



UN KOMITET ZA ELIMINACIJU DISKRIMINACIJE ŽENA OSUDIO PROPUST BOSNE I HERCEGOVINE U PODRŠCI PREŽIVJELIM RATNOG SEKSUALNOG NASILJA

(Sarajevo, 31. august 2020) 19. jula 2020. godine, UN Komitet za eliminaciju diskriminacije žena (UN CEDAW) donio je prvu odluku protiv Bosne i Hercegovine, potvrđujući da je “rodno zasnovano nasilje nad ženama oblik diskriminacije i torture”. Komitet je pozvao državu da pruži izravnu podršku preživjelim ratnog seksualnog nasilja. Ovo je historijska odluka, prva koja imenuje BiH odgovornom, kao i prva koja priznaje patnju preživjelih seksualnog nasilja.

Odluka UN CEDAW potaknuta je slučajem zastupanim od strane TRIAL International, u kojem država Bosna i Hercegovina preživjeloj nije omogućila nepristranu i učinkovitu istragu, te zagarantovala pravednu i odgovarajuću naknadu.

“Još jedna odluka važnog međunarodnog tijela za zaštitu ljudskih prava potvrđuje da se u BiH još uvijek neefikasno radi na zaštiti prava preživjelih ratnog seksualnog nasilja”, naglasila je **Lamija Tiro**, pravna savjetnica TRIAL International. ***“Sve više osnaženih preživjelih voljne su pravdu tražiti na međunarodnom nivou, prethodno iscrpivši sve pravne mogućnosti na domaćem nivou.”***

Odluka UN CEDAW nije ograničena samo na ovaj slučaj, zastupan od strane TRIAL International. Komitet također poziva BiH da osigura brze, nepristrane i učinkovite istrage u svim predmetima rodno zasnovanog nasilja, posebno u predmetima ratnog seksualnog nasilja. Također je naglasio iznimnu važnost osiguranja odštete i drugih oblika reparacija preživjelima. UN CEDAW je u svojoj odluci posebno naglasio da zahtjevi preživjelih za naknadu štete za seksualno nasilje ne mogu podlijegati zastarama.

“Ova odluka je jasna poruka od Ujedinjenih Nacija bh. vlastima da poštuju međunarodne obaveze, te da blagovremeno i adekvatno odgovore na zahtjeve preživjelih ratnog seksualnog nasilja, kao jedne od najranjivijih grupa u Bosni i Hercegovini”, istakao je **Philip Grant**, izvršni direktor TRIAL International.

TRIAL International nevladina je organizacija koja se bori protiv nekažnjivosti počinitelja najtežih međunarodnih zločina i podržava žrtve u njihovoj borbi za pravdu.